

# तुबारि

**SAINT TECDHARAM**

English medium SCHOOL  
ADMISSIONS ARE STARTED. Ph.9418378712  
Discipline Smart work Quality education  
High qualified teachers with personal care  
100% Results in annual exams 2010 with 97% above marks  
Our students got first position in Dist Chamba and top  
five positions at Pangi block in 5th class annual exams

पं ग वा डि मा सि क प त्रि का

## तुबारि संपादकीय टीम

◆प्रिंटिंग मेशिने खराबि जुए, इस फेरि तुबारि पत्रिका फोटोस्टेट किओ से। त तुबारि पत्रिका पढ़े वाड़े जे अनुरोध असा कि अगर कोई प्रिंटिंग सुसुर न भोल त असि जरूर माफ करे। अगले यक दुई संस्करण अन्तर इस ठीक कइ सकते।

◆इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगि घाटि अन्तर पढ़े जे इ पत्रिका शुरू किओ सि।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति जे गलति कडेण जे नेई छपाण लगो। अगर कोई ई सोचता बि त अस जिम्मेबार नेई।

◆छपाणे पेहले सोभ आर्टिकल दुई टाई पांगेइ मेहणु हरालो असे। इ त खुलि बोक असि कि पेहिल बार पंगवाडि लिखणे सुआ मुशकिल भुन्ति त गलति बि भुन्ति। अगर कोई लिखणे गलति असि त असि जे जरूर बोले। त अस तसे हारे संस्करण पुठ ठीक करणे कोशिश कते।

◆आर्टिकल्स ना मिएल, या घाटि मेहणु के मदद ना मिएल त तुबारि पत्रिका कदि बि बंद भुइ सकति।

◆कोइ चिज छपां सि या नेई छपां जे तुबारि संपादकीय टीमे पुरा अधिकार असा।

◆अस सोभि पांगि मेहणु जे हात जोड़ कइ निवेदन कते कि, तुस बि कोइ अब्बुल अर्टिकल, पुराणि या नौई कथा, कहावत, कविता, त नौवे घीत (पंगवाडि अन्तर) लिख कइ छपां जे हेन्न्दे दिए।

◆अस किलाइ केन्द्रीय पुस्तकालय, त बजार ठेके भैइ हरिरामे दुकान अन्तर तुबारि ड्रॉप बॉक्स पुठ बि अपु सझाव ओर अर्टिकल्स रख जे सुविधा किओ असि।

☎ 9418431531

☎ 9418429574

☎ 9418329200

☎ 9418411199

☎ 9418411599

## दादुआ तोउ अउं सचे ट्यारा असा ना ?

एउंश अउं जुकारु अन्तर भियाड़े धाम खांजे गोओ थिआ। तेठि यक कोई अठ मेहने कुआ अपु दादु कल्हई पुठ बिश कइ खेलण लगो थिआ। दादु खुशी जुओई पोतुर जे फोकइयाताथ त सिरगट टाइ कइ दम देन्ताथ। इ हेर कइ अउं परेशान भोई गा। मेई सोचु, इ दादु सचे अपु पोतुर जुए प्यार करण लगो सा या जेहरिल्ला तू बइ अपु मठूड पोतुर जिंदगी खराब करं लगो सा। (सिरगटे तू अन्तर चाढि जेहरिल्ला रसायन भुन्ते।) इ लेख सिर्फ तेन्हि जे, जे दमदेण बाडि के भैइ बिशते त जाने अंजाने अन्तर सिरगटे तू, सांस जुओई अन्तर नेन्ते (Passive smoking) । क्युं कि दम देने बाडि जे बोलुं जे सिरगटे डेबूड पुठ लिखो असु त सुआ मशुरि बि असि।

डाक्टरि विज्ञान साबित किओ असु कि सिरगट या विडि तू अन्तर चाढि जेहरिले रसायन भुन्ते जेन्के बोलि सोबि जे खतरा भुन्ता। पर मठूड गभुर जे सुआ खतरा असा। अमेरिका कैंसर सोसाईटि त रोग नियंत्रण एवं रोकथाम केन्द्र इस बारे की बोलुण लगो सा, इस पढे हेरे।

●मठूड गभुरू फेफड़े मठे मठे सुहिलयत भुन्ति। तपल सिरगटे तू केआं बचणे ताकत गभुर अन्तर न भुन्ति। जे गभुर सिरगटे तू जुओई बिशते तेन्हि घडि-घडि जुकाम त खंख लगति त निमोनिया, दमें बिमारी बि एई सकति। अमेरिका कैंसर सोसाईटि बोति कि “हर साल अमेरिका अन्तर डेढ लख केआं टाई लख तक, अठारा मेहने केआं उन्हिया गभुर सिर्फ सिरगटे जेहरिल्ला तूएँ बोलि बिमार भुण लगो से।

●जे गभुर दमदेणे तू सांस जुओई अन्तर नेन्ते तेन्हि झठ कने बिमारी एई सकति त से घट शुणते।

●तेन्हि गभुर अन्तर अभेई या कुछ सालुं बाद कैंसर त दिले बिमारी एणे संभावना सुआ रेहंती।

●तन्के हछा लेहु कोशिका सुसुर कम न कति त जिसम प्रतिरोधक क्षमता(इम्युनिटि) घट भोई कइ सुआ बिमारी एन्ति।

●क्यों कि तन्के दिमागि सुहिलयत सुसुर न भुन्ति, त तेन्हि व्यवहार करुं ओखा भुन्ता।

●अगर ईया बोउ अन्तर कोई बि या गभुरूवाल जिल्हाणु दम देन्ति, त जे गभुर पेट अन्तर भुन्ता, तस बि बिमारी भोई सकति। डाक्टर बोते कि तन्के गभुर सतियेछु जमते। त तन्के दिमाख सुसुर सुहिलयत न भुन्ति। शीचणे कमजोरि त फेफड़े बिमारी बि भुन्ति।

●जे गभुर मठणियार सिरगटे तू जुओई भुन्ते, से अपु पढाई अन्तर बि कमजोर भुन्ते त अपु दोस्ति जे अक्कडते रेहन्ते। क्यों कि तन्के मन सिरगटे तूएँ बोलि कमजोर भोई गोऊओ भुन्ता।

●गभुर, जे सुआ टेम सिरगटे तू जुओई भुन्ता, से हेरण अब्बुल न भुन्ता क्यों कि तस छोडि कोषिका जुए घट अक्सीजेन मेति।

दम देण बोलि जे खतरा हें जिसम पुट ऐन्ता से सोबि जे पता सा। पर अभेई बि सुआ गभुर तेन्हि खतरा अन्तर घेण लगो से। तोउं त भारत सरकारे दफतर त हारे साधारण जगाइ पुठ दम देण गैर कानूनन बणाई छो सा। पांगि घाटि अन्तर इ हेरुं जे मेउं कि सुआ मठूड गभुर सिरगटे तू जेई भुन्ते। पर, इ बोते न जी “गभुर परमेश्वरे आशिर्वाद भुन्ते”। त तन्के ख्याल रखूं हें जिम्मवारि असि। दमदेणे बलि जे खतरा भुन्ता तसे बारे ईया बोउ त गभुर समझाणे जरुरि असा।

## गी बोता..... कविता

में नउं त असु गी जी  
बणता अउं कठोड त घोड़े बइ जी  
बणांते मोउ मेहणु जी  
पर भुन्ता त में सोभ कुछ जी  
बर्षाढ त ठनियारे त मेहणु बचान्ता जी  
दुश्मन त बुरि नजर जे बि बचान्ता जी

में अन्तर मेहणु जमते मरते जी  
त में अन्तर मेहणु रोलते हसते बि जी  
धाम त कठि, मसुवार दुईहे पता सा जी  
इ त नेई कि सिर्फ मेहणु मोउ बणांते जी  
अउं बि मेहणु दिल अन्तर बणि घेन्ता जी  
मेहणु चहें जेठ बि भोल,

में चेता तेन्हि एन्ता रेहन्ता जी  
केहि केहि त सोचते जी  
मोउ लौता मन्जा, डेक त टिबि सेट जी  
केहि सोचते जी मोउ लौते रुपेयि, त धणि जुएलि जी  
पर अउं बतान्ता सचु जी,

इ सोभ चीज जचति, पर जरुरी नेई जी  
मोउ त जरुरी असा प्यार जी, हाउ कुछ नेई।  
में अन्तर मेहणु सुसुर बिशयेल,  
अपफ बछ प्यार जुओई बिशयेल  
त अउं अब्बुल लगता जी। ..... षम्मा

### काकुरामे अकल - चुटकुला

काकुराम नाउए यक मेहणु थिआ। मेहणु तस जे बोतेथ “काकुरामे अकल तसे थुरी अन्तर असि। यक रोज काकुरामे लाथ बहरि धुप रेहि गोउ। खरी गरमी भोई गइ। काकुराम डरा। सोचुण लगा कि में लाथ त सुआ बुखार चढो सा। जे तेठिआ नठा, दौड देन्ता, डाक्टर केई पुजा। डाक्टर सोब कुछ समीझ गो थिआ। डाक्टरे लाथ रेजुई बइ बन्हू त कुंए अन्तर ढनाई छोउ। बोलु कि तु थोडि देर बाद एई कइ घिन गा। जपल काकुराम तेठि पुजा त हेरान भोई गा। ओ हो! सचे लाथ ठनु भोई गो सु। बुखारे ऐ बधिया ईलाज असा। कुछ दिन बाद, काकुरामे ईया तेज बुखार भोई गा। काकुरामे सोचु कि ईये बुखार त अउंए उतार सकता। झठ तेनि अपु ईये किआडि बइ रेजुड बन्हि कइ से बिचारि कुंए अन्तर ढनाई छइ। थोडि देर बाद आ त रेजुड खडिआ थुसता त कि हेरता? ईये टी त दन्त बहर निस गो थिए। त जिसम पुरा ठना भोई गो थिआ। काकुराम सोचुं लगा कि ईये बुखार उतीर कइ कति खुश नजर ऐण लगे सि। .....देवराज राणा, परमसा।

### कुछ खास खबर

- ◆ एप्रेल 13 तरीख लिशु धनिस असु। विक्रम सम्मत हेसाब जोई लिशु केआं खडि नोंवा साल लगता।
- ◆ हियुंथ खत्म भुण केआं पता पंगेई नाज जगई अन्तर लागे-बाणे कम शुरु भुं लगे सा।
- ◆ साच घराट पोणि बुछ यक मरो जिल्हाणु मेई।
- ◆ घाटि अन्तर एप्रेल 10 -13 तक मेग खराब भुणे असार असे। (Foreca Weather report )

बोउ बन्ति जे.....

By Shubham



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574



मनिश राणे शुरु किओ सा



# LONELY PLANET RESTAURANT AND HAWK HEIGH ADVENTURE

Beside CHC lab, Killar, Pangri ☎ 9418804701; 9418239677.

Our specialties:- Three room chambered restaurant for official parties, families, and privacy. Tasty, fresh and hygienic food is served. Specialized in Chinese and Kashmiri dishes. Maize roti, mutton sigroo and other local tasty dishes are also available.

We manage Trekking, Hiking, skiing, camping and company tours for tourists

*We undertake catering and party orders*